



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 8

Electoral bonds ya subokrem dang lir: P Chidambaram

Ons Jabeur-i Ningbo Open kokogo



VOL. XX NO. 350 (ADOK 350) DIMAPUR AMUNGNÜ (SUNDAY) MONGPUTENI (OCTOBER) 01, 2023 ₹ 5.00

Oct 7 tashi Rs 2,000 note melentetsü: RBI

New Delhi, September 30, 2023 (Agencies): Reserve Bank of India (RBI)-i bank nung Rs 2,000 note melentsüba anogo October 7 tashi atsulangogo.

RBI-i September 30, 2023 tashi nung Rs 2,000 notes melentetsü mapang atakzükja liasü saka ibaji October 7, 2023 tashi atsulangogo.

October 8 nungibo bank nung Rs 2,000 memelentetsü saka RBI indang office 19 nungbo melentetsü. Nübertemi

India Post ajanga RBI indang "issue offices" dangi post ajanga sen yoktsü akok.

May 19 tashi nung Rs 2,000 notes ya Rs 3.56 lakh crore tashi amshia liasü aser iba nungi Rs 3.42 lakh crore tashi melenogo. September 29 tashi nung Rs 2,000 notes Rs 0.14 lakh crore shi dang memelen lir, ta RBI-isa metetdaksüogo.

May 19 tashi nung Rs 2,000 banknotes amshia aliba nungi 96% tashi RBI keti aruogo.

NSCN-IM ket nungi nisung ka kümzük

Dimapur, September 30, 2023 (TYO): September 29, 2023 nü Singrijan/Selouphe lenjem nung telungpurtemi nisung kar pur oya lia police-i kümzükogo.

Hokolbar aonung 9:50 ako meta Sovima Police Station duty party ka ajanga MVCP inyakang registration number plate maliba Maruti Alto car (silver colour) ka sot ta Dy. Commissioner of Police (Crime)/PRO, Dimapur-i sangdong ka nung metetdaksü.

Police-i gari mita reprangdang nisung pezü mena liasü aser par aseme parnok NSCN-IM züngsemtem ta ashi aser tanünga nisung jagi pa GB New Market area, Dimapur Abdul Kayum Talukdar ta langzü.

Police-i gariji maneni mita aodang tammang nung nisung ka jena ao aser ibaji Captain Ahor Tangkhul ta par külem züngsemtemi ashi.

Abdul Kayum Talukdar dang asüngdangya asüandang pa Hotel Theja Fort, Burma Camp anasa nungi par asem jagi tashiyim agi apu aser iba gari nung mener anir ao ta ashi.

Talukdar-i ashiba nungji ajemdaker New Market Business Owners Association züngsemtem lia police-i par kinunger ket nung pa agütsü, ta Dimapur Police PRO-isa sangdong nung ashi.

Iba tatalokba dak sendakba nung nisung ana puogo aser East Police Station, Dimapur nung FIR ka benokogo.

Police-i apurtemji Captain Masalepkum (S/o Talinungkum, V/o Kantsung, PS - Tuli, District - Mokochung, P Add - Burma Camp, Rongmai Colony) aser Lieut. Isacar Swu, 39 yrs (S/o Yetoche, V/o Khughuto, PS - Pukhuboto, District - Zunheboto, PAdd - 4th Mile near Agri Expo) ta jangjaogo.

Manipur nung linük ana den kiralongratsü tasa atonger ka apu: NIA

New Delhi, September 30, 2023 (Agencies): Manipur kübok Churachandpur district nung kiralongraba mapa inyaker ta temulung melemi bilemba nisung ka National Investigation Agency (NIA)-i puogo.

Iba nisungi Bangladesh aser Myanmar nung kiralongrar lenirtem den tasa atong ta NIA-isa ashi. Iba nisung dang asüngdangya asütsü atema Delhi-i anir ogo aser maneni bushisingdangtsü ta parnokisa ashi.

Pai Myanmar aser Bangladesh nung pa den yaritepertem den külemi Manipur nung mapa tamajung inyaksü tasa yanglur liasü ta NIA-isa ashi.

"Kiralongraba mapa inyaker ta tai tongloka alisang Seiminlun Gangte-i Myanmar aser Bangladesh nung kiralongraba telok lenirtem den Manipur nung mapa tamajung inyaka India anema rara menatsü tasa atong" ta NIA-i metetdaksüogo,

June 22 nü Manipur kübok Kwakta nung bomb agi gari poksatsüandang nisung ka tepsetba ken o nung tongti süa tai tongloka alisangji Gangte lir. Iba anogo apu tila ka anasa anena ayuba Scorpio SUV gari ka apokba sülen tensa tamajungba aküm. Iba ya kiralongrar mongin kar ajanga inyakba mapa liasü.

Ajisüaka, NIA-i Gangte ya koba telok nung züngsem'ar memetdaksü.

Kuki telungpur telok 25 shi kati Centre, state sorkar aser mitkartem den trilateral suspension of operations (SoO) nung sign sütepa lir. Iba SoO ajanga telungpurtem pei pei designated camps nung dang alitsü aser monitored storages nung prangpong-injang ayutsü lateta lir.

Ajisüaka, Manipur mepetmesü nung SoO agreement nung sign süa alir telok kari shilem agir ta ken o kar adoka lir. (Maneni tapak 2 nung...)

Governor Ganesan-i anir "Shramdaan for Swachhata" inyak



September 30, 2023 nü Shramdaan for Swachha Nagaland nung Governor La Ganesan-i Raj Bhavan compound nung kiektsü agi lenmang okdokdang agiba noksa ka angur.

Swachhata" inyakogo.

"Merükmejuba ajanga temang nung tashidak aika nungi kümzük aser merükmejuba ya temeshi süa aliba sülen lir. Anungji nisung ajaki tashidak balala nungi kümzük alitsü atema pei pei kidang, temeket aser yimdong nung merükmeju mapa inyaksüla" ta Ganesan-i ayongzük.

"Tanü asenoki lokti merükmejuba mapa inyakba ya sentong ka dang saka asenok ajaki pei pei taküm liraliro nung merükmejua alitsü merangdi" ta paisa ashi.

Iba sentong nung Secretary to Governor, Rajesh Soundararajan, Raj Bhavan ketdangsürtem aser staff, security personnels, Kohima DC Shanavas, KMC Administrator aser ketdangsürtemi shilem agia liasü.

Kohima, September 30, 2023 (PRO, Raj Bhavan): Prime Minister Narendra Modi-i October 2, 2023 nü Gandhi Jayanti jakdang linük ajungalen merükmeju mapa inyaksü ayongzükba ama Nagaland Governor La Ganesan-i anir Raj Bhavan aser temeket merükmejua mongogo. Tanü Governor Ganesan lenisüba kübok "Shramdaan for

Bloom Bazaar ajanga "Made in Nagaland" ajungketer: CM Rio



September 30, 2023 nü Bloom Bazaar nung Chief Minister Neiphiu Rio den IDAN ketdangsürtem aser tangartem külemi agiba noksa ka angur.

Kohima, September 30, 2023 (DIPR): Bloom Bazaar ajanga "Made in Nagaland" ajungketer ta Chief Minister Neiphiu Rio-i tanü ashi.

"Team Nagaland metsü prokba atanger aser mangdang atalokogo aser iba ajanga Bloom Bazaar tenzükogo. Iba asoshi Abu Metha-i anir Investment and Development Authority of Nagaland (IDAN) ketdangsürtem nem tenüngsang agütsür" ta CM Rio-i ashi.

Pai mezüng atema Chief Minister inyakang Naga lanurtem taginüba aser tejangrabatem ajitet aser idangji sorkari parnok teimla aser pungmangtem atalokdaksütsüla angat ta Rio-isa ashi.

"Nagaland ya lisopurtem aliba tesem aser kin shiai pei pei sobaliba benjung amongba agi district headquarters ajak nung Road Show tenzük liasü. Lanurtem aser nübertem dang pei sobaliba wazüka ayutsü tangatetba agütsütsü atema iba sentong tenzük agi aser Hornbill Festival nung tembang. Tanübo Hornbill Festival ya national masü

saka international festival ka kümogo" ta CM Rio-isa metetdaksü.

"Benjungbentsü, mungdang, tenla kidang mesüra kidang süang naro ya kanga tongtipang lir. Naro terara shishilembartem tanübo tulu kümogo. State sorkari Horticulture department ajanga floriculture ajungmesoa aru aser tetsürtem atema Women Development Department ta ser department balaka tentetsüogo. Iba ya floriculture aser Naga nunger subosulemtsü dak rangloker tenzük" ta paisa ashi.

Pa kinungtsüia naro kanga sapua meimer aser laisa naro tsünürtem ajungmesoa arur. Tanü naro tsünürtem külemi longjemer commercial level tongogo, ta Rio-isa shisem.

"Anüolen aliba linüktem nung off season mapang naro metsünüteter aser iba jagi parnok benjungbentsü nung tanga linüktem nungi naro aika agir. India-ia kümshia sen crore aika jenjang naro yoker aser \$100 million global flower business market nung India 13% lir" ta Chief Minister-isa ashi.

"Asenoki naro tajung anepalua tsünürabangla aser tajangzük aliba mapang meteta tsünüra tsünürtem dang masü saka naro amshitem dena ajangzüksü. Bendangertem Nagaland-i arudang naro anepalua ayuba nung temulung asüba aiben shiogo" ta Rio-isa ashi.

Bank temi naro tsünürtem nem sen aputsüba atema kanga pelar aser nenoki maneni Nagaland nung naro tsünürtem yaritsü imlar, ta paisa shisem.

Paisa lanur entrepreneur tem dang bank den sendakteptsü aser bank sobaliba benshitsü ayongzük.

CM Rio-isa Chief Minister Micro Financing aser IDAN ajanga sen apunürtem yariba indang osang lemsatep/

Iba sentong nung pai floriculture business aser entrepreneurship nung beneficiaries nem cheques lema agütsü.

Sentong nungsa Advisor to Chief Minister & Chairman IDAN Abu Metha, Joint Secretary IDAN Reny Wilfred aser Under Secretary IDAN I Changsang nungeri o jembi.

Soil & Water Conservation Department-i S.K. Hekshe den tepila sentong agi



Soil & Water Conservation Department indang Director menden nungi anisungzükdang S.K. Hekshe den tepila sentong agidang tangokba noksa ka yangi angur.

Dimapur, Rongjui/Sept. 30 (TYO): Soil & Water Conservation Department nung Director menden nungi anisungzüksang S.K. Hekshe den tepila sentong ka department indang Conference Hall, Kohima nung September 30, 2023 nü agia liasü.

Iba sentong nung menden A.S. Hovuto, Project Director liasü aser Khriesatuono, Registrar ajanga director menden yutsüsang otsü tatsüka lemsatapa pa lenisüba kübok takok balala ngutetba

indang osang agüja liasü. Iba sentong Commissioner and Secretary, Soil & Water Conservation, K. Libanthung Lotha, IAS-i moaja jembidang director menden yutsüsang nem tenüsang agütsü aser pa ya tongmelang, ajemalur, nendaka inyakba takum ka lir, ta ashi.

Additional Director, L. Chubaonen-i iba sentong nung jembidang, S.K. Hekshe yagi tensa ajak kanga junga ketdang süteter aser mapa kanga junga inyakteter nisung

ka lir, ta ashi. S.K. Hekshe-i tepila o jembidang Department indang ketdangsür aser staff temi amalitepba aser bendanga agütsür inyakba atema pelaba lemsatapa liasü.

Department nungi ketdangsür balalai iba sentong nung tepila o jembia aser tenüsang agüja liasü.

Sentong tembanga melepzüng o Litemo Murry, Joint Director ajanga jembia aser sentong temer chiyongba mapang liasü.

Tening jila nung temesepba mozü anema rally agi

Dimapur, Rongjui/Sept. 30 (TYO): Temesepba mozü amshiba anema rally ka September 29, 2023 nü Tening jila nung aliba Town Square nung "People First, Stop Stigma, Discrimination and Strengthen Prevention" omen kübok agia liasü.

Iba sentong ya District Administration ajanga Anti-Drug Committee Tening (ACT) den lungjemer ayongzüka liasü.

ADC Tening, Lemlila Sangtam, NCS ajanga iba sentong nung o tatsüka jembidang lokti ajungmesoa pei sasa pei yaria aser nüburtem temesepba mozü nungi kumzüka alitsü indang ashi.

Tening jila nung tanurtem aser kaketshirtem ya Naga nung tarutsü nükla lir, anungji temesepba mozü anema

telungjem nung nokdaksüla, ta lai ashi. Temesepba mozü achi-ajemba ajanga kaketshir tekolok aser temang tashi mait kumdaksü aser tashidak balala menar, ta lai ashi.

ADC Tening ajanga lokti tentet balala, CSOs aser kaketshir tentet tem dang temesepba mozü maliba lokti ka kumdaksütsü ayongzüka liasü.

School aser dangar temi iba sentong nung shilem agiba atema lai tenüsang agütsü aser tarutsü anogotem nunga Administration ajanga akokba lenmang nung yariteptsü molunga lir, ta ashi.

President, Tening Town Youth Organisation, Kaibakam-i iba sentong nung jembidang, temesepba mozü achi-ajemba ajanga temang aser tekolok

menentsüba kistung masü saka pei career ralsatsür, ta ashi.

Anungji nisung ajaki temesepba mozü dang 'mah' ta ashitsüla aser awareness prokshia pei aser aseni meima aliba takum kumzüksüla, ta ashi.

Iba sentong nung President, Liangmai Council (N) aser President, Zeme Council, Tening Town nungeria o tatsütsü jembia liasü.

Iba sentong nung GHSS, Baptist High School, SFS School aser Heraka School Tening nungi shilem agia liasü.

Iba sentong ya tenzüka Youth Pastor, TNBP, Khiupume-i sarasadem, Keringseyi Ringdy aser medemer temi ken ka aten aser President, TSU ajanga melepzüng o jembia liasü



Deputy Commissioner, Chümoukedima, Abhinav Shivam IAS-i NHIDCL indang Managing Director dang September 29, 2023 nü National Highway 29 indang Package 1 aser 2 semdangba mapang maparen inyakba nung temolung masüba lemsataper.

Mokokchung nung SWEEP sentong agi

Dimapur, Rongjui/Sept. 30 (TYO): Systematic Voters Education and Electoral Participation (SVEEP) sentong nung shilem ka ama Deputy Commissioner aser District Election Office, Mokokchung ajanga Nagaland Sports Association den lungjemer ananü football coaching cum felicitation sentong ka ayongzüka liasü.

Iba sentong nung shilem agirtem Electoral roll nung tenüng zülüoka ali-mali jangjatsü asoshi awareness agütsütsü aser temsüa alirtem yangji enroll südaksü nükjidong nung iba sentong ya Imkongmeren Sports Complex

nung September 29-30, 2023 anogotem ayongzüka liasü.

September 29, 2023 nü iba sentong tenzükdang ADC Mokokchung, Chumlamo Humtsoe-i ashiba agi, lanurtem nem electoral awareness agütsütsü aser lanurtem football nung shisatsü agütsütsü nükjidong nung Election Commission of India ajanga SVEEP sentong ya ayongzüka.

Iba sentong nung menden Assistant District Election Officer, Mokokchung, Renben Mozhui liasü, Dr. Tiameraen, Lecturer, CTC Aolichen ajanga sarasadem aser CTC kaketshir temi ken tajung ka tena liasü.

F&ES ajanga Tseminyu nung mock drill agi

Dimapur, Rongjui/Sept. 30 (TYO): Haitilo Semy (ASI) lenisüba kübok Department of Fire & Emergency Services, Kohima (North), Government of Nagaland ajanga September 30, 2023 nü Tseminyu Town

Council Market Complex nung Mock Drills agia liasü.

Kitsük-kirong lendong nungi jenbua alitsü aser takum kumzüka alitsü atema awareness agüja iba sentong ya ward trok asoshi ayongzüka liasü.

Longleng nung Poshan Maah tembangba sentong agi



Dimapur, Rongjui/Sept. 30 (TYO): Department of Social Welfare, Longleng ajanga Poshan Maah tembangba sentong ka September 30, 2023 nü CDPO Office, Longleng nung agia liasü.

Er. T. Shahnyu Phom, Sr. Supervisor ajanga Poshan Abhiyaan - National Nutrition mission and Poshan Maah 2023 indang rateta ashidang 'Nutritional Rich India, Educated India and Empowered India' omen nung ajemdaker iba sentong ya tenzüka aser sorkari Poshan Maah ajanga sentong balala ayongzüka agiogo, ta ashi.

National Nutrition Mission nung Anganwadi worker aser teyariteper temi anibelem mesasai inyakba atema pai tenüsang agütsü aser Poshan Maah benjongmung ajanga district nunga terenlok lir, ta ashi.

Pai Anganwadi worker aser helper tem dang sorkar indang scheme balala aser item scheme mapa kuma inyakba nung tawa adoka alidak apular ama Jan

Aandolan ajanga nüburtem nem awareness agütsütsü ayongzüka.

L. Shamdok Menlei Phom, Supervisor ajanga sempet agütsü aser Best Performing Anganwadi Workers ya Y. Pangchu Phom, Longleng-D nem agütsü aser Best Performing Anganwadi Helpers sempet ya M. Phengmei Phom, Orangkong-B nem agüja liasü.

Cooking competition nung Oushak-A ajanga mezüngbuba jenjang ngutet aser Dungkhaoo-A aser Bhumnyu-Cand Bhumnyu-E nungeri tanabuba aser tasembuba jenjang nguteta liasü.

Kasa mapang sempet angurtemia o tatsütsü jembia liasü.

Ngupla, AWW Longleng-G ajanga Poshan Maah nung lai ajangshiba indang lemsatapa liasü.

Iba sentong nung menden S. Longhong, District Coordinator Poshan Abhiyaan liasü aser melepzüng o Pauloi Phom, District Project Assistant, Poshan Abhiyaan ajanga jembia.

Manipur nung linük... (Tapak 2 nungi...)

"Myanmar aser Bangladesh nung amenoka aliba telungpur telok kari India nung telungpur lennir kar den ozüng alema mapa inyaksü tasa atongba bushitetogo. Parnoki kin balala tsüngda mangatetep adokdaksütsü aser India sorkar anema rara menatsü tasa atongogo" ta NIA-i tanü metetdaksüogo.

"Iba mapa atema telungpur

lennirtemi prangpong-injang aser tanga osettem alitsü atema senotsü teyari agütsüogo" ta parnokisa ashi.

Tesüiba anogo 9 tsüngda Manipur nung kiralongrar ana puogo aser Gangte ya tanabuba lir. September 22 nü NIA-isa kiralongraba ken o ka dak sendakba nung Moirangthem Anand Singh apu.

Sen 2,000 note melenteptsü atema tatembangbuba sangdongogo

New Delhi, Rongjui/September 30 (Agencies): Reserve Bank of India (RBI)-i Honibarnü sangdong ka ajanga sen 2000 note melenteptsü asoshi tatembangbuba anogo October 7 tashi atsülangtsüogo, koba October 1 nü liasü.

Sen agizüksü atema mapang agütsüba tatembang kati aruba mapang aser ken o asadanga sülen sen 2000 note deposit asütsü aser meelenteptsü asoshi tatembangbuba anogo October 7 nü kümstsütsü asoshi telemtetba agiogo, ta RBI sangdong ka ajanga metetdaksü.

RBI-isa, bank tem nungi data agizükba dak ajemdaker May 19, 2023 tashi nung sen lakh crore 3.56 alang 2,000

banknotes circulate asüba nungi sen lakh crore 3.42 agizükatokogo.

Iba tetezü September 29, 2023 tashi nung sen lakh 0.14 crore alang sen 2000 note dang maneni amshidar.

"May 19, 2023 tashi nung amshia aliba sen 2,000 banknotes shilem 96 bo meyipa aruogo," ta RBI-ashi.

May 19 nü RBI-ashi sangdong ka ajanga, October 1 nü nungi tenzüka sen 2,000 denomination banknotes tem amshi anentsü ta metetdakja liasü.

Iba note ya taruba exchange deadline matong tashi legal asütsü.

Ajisüaka RBI-ashi bank tem dang sen 2000 note ya ojang dang agütsütsü metetdaksüogo.

PM Modi-i 'Sankalp Saptaah' sentong amenoktsüogo



Ato Kilonser Narendra Modi den Union Minister Giriraj Singh, Dharmendra Pradhan, Bharati Pawar, Sadhvi Niranjani Jyoti aser tangartem Bharat Mandapam nung Aspirational Block tem atema hopta ka tepeyong agitsüba sentong; 'Sankalp Saptaah' amenoktsüba mapang tangokba noksa nung angur.

New Delhi, Rongjui/September 30 (Agencies): Ato Kilonser Narendra Modi-i Honibarnü linük yimtiba nung Bharat Mandapam mapang linük nung Aspirational Block tem atema 'Sankalp Saptaah' ta nungja agütsür hopta ka tepeyong agitsüba sentong ka amenoktsüogo.

'Sankalp Saptaah' ya Aspirational Blocks Programme (ABP) takok ngua benoktsüba dak sendaka lir.

Linük ajunga nung ayongzüka agiba sentong ya Ato Kilonser-i 2003 küm January ita amenokja liasü. Iba ajanga lisopurtem libaliro jenjang tajungba küma ajungkettsütsü asoshi block level nung governance tajungba kümdaktsütsü nükjidong lir.

Iba sentong ya linük nung district 329 kübok Aspirational Block 500 nung amenoka lir. Aspirational Blocks Programme benoktsü aser block development strategy tetangshi ka renemtsü atema linük ajunga nung yimtsüng aser block level tem nung chintan shivirs ayongzüko. 'Sankalp Saptaah' ya item chintan shivirs tem teloktep ka lir.

'Sankalp Saptaah' sentong ya Aspirational Block 500 prongla nung ayongzüka amungtsü. October 3 nü nungi tenzüka October 9 nü tashi nung 'Sankalp Saptaah' sentong ya anogoshia development omen balala dak ajemdaker agitsü aser iba dak ajemdaker Aspirational Block ajak inyaksangshitsü.

Anogo trok atema omen tem rongnung 'Sampoorna Swasthya', 'Suposhit Pariwaar', 'Swachhta', 'Krishi', 'Shiksha', aser 'Samridhi Diwas' densema lir.

Hopta nung tatembangbuba anogo koba October 9 lir, iba anogo ya hopta tepeyong mapang balala inyakyonga aruba benjunga 'Sankalp Saptaah - Samavesh Samaroh' ama amungtsü.

Iba programme lapokba sentong nung linük ajunga nungi panchayat aser block-level nungi nüburtem tenüng nung nokdakertem 3000 shi-shilem agiba angutsü.

Iba den bendenloksema block aser panchayat level functionaries, aluyimertem aser wadang balala nungi nübur lakh ana shi-iba sentong nung virtually shilem agitsü renema lir.



Centre sorkari fund nokdangtsüba atema MGNREGA job card bena alirtem aser iba ajanga kongshirtem Kolkata nung longkak aitba sentong ka nung shilem agitsü atema aotsü asoshi Netaji Indoor Stadium nung adenshiba noksa nung angur.

Line Of Control nung kiralongrar ana tepset

Srinagar, Rongjui/September 30 (Agencies): Jammu and Kashmir kübok Line of Control (LoC) nung Honibarnü Kiralongrar ana arrtsü adena aitba sülen security forces temi tepsetogo.

Iba tatalokba ya Kupwara district kübok Machil sector nung ataloka liasü, ta osang ajanga metetdaksü.

Meita aoba tesem nung AK prangbong ana aser injang ngutetogo, ta Kupwara Senior Superintendent of Police Yogul Manhas-i ashi.

Kasa mapang Army-i ano arrtsü adena aiter ana aputsü atema meita aoba mapang ka lir, ta police-isa metetdaksü.

Arrtsü adener aliba handler temi kiralongrar telok ka

yoktsü meranga liasü ta Jammu and Kashmir Police-i osang tejangja ka agütsüba sülen iba dak ajemdaker counter-infiltration operation ka tenzüka liasü, ta parnokisa metetdaksü.

Arrtsü adena aiterem ya Machil sector kübok Kumkadi tesem nung nokdanga liasü.

Kasa mapang nung south Kashmir kübok Tral tesem nung security forces temi kiralongrar indang tesepe ka raksatsüogo, ajisüaka bushisngdanga mapang prangbong injang aser hadir kecha monguteti liasü.

Maneni Jammu and Kashmir nungsa iba ita tetenzüklen Anantnag kübok arem mein nung hopta ka tepeyong kiralongrartem meita

aoba sentong ka ayongzüka agiogo. Iba meita aoba sentong ya taoba hopta tembangogo. Sepaitemi iba arem mein meita aoba mapang Lashkar commander ka aser tanga kiralongrar ka tepseta liasü. Kiralongrar den rara nungsa ketdangsür asem densema security personnel pezü asü.

September 16 nü Anantnag nung meita aoba sentong ayongzüker agia aliba mapang, sepaitemisa kiralongrartem arrtsü adena aitsü merangba nokdanga liasü. Iba mapang kiralongrar ana tepset aser ano ka yiruja liasü, ajisüaka Pakistan tsütsülen nungi injang khaloktsüba ajanga yirur alisang ya jena otet, ta India Army-i ashi.

Electoral bonds ya sübokrem dang lir: P Chidambaram

Chennai, Rongjui/September 30 (Agencies): Taoba mapang Union finance minister P Chidambaram-i Honibarnü ashiba agi, electoral bond tem ya temzüng ozüng kübok temelaba agütsür aliba sübokremtem (legalised bribery) lir aser iba ajanga ajak dang nungi BJP taliba ajangzüksü.

Union sorkari 28buba electoral bonds tranche October 4 nü lapoktsü ta sangdongogo. Rajasthan,

Madhya Pradesh, Chhattisgarh, Telangana aser Mizoram nung state assembly election agitsü lia tang iba osang ya sangdongogo.

Iba dak sendakba nung Chidambaram-i X sabang ajanga ashiba agi, electoral bonds ya BJP atema kanga tajangzüko mapang ka asütsü.

Taoba mapang bendena aliba data tem indang jembiba mapang pai, "tenla agütsübatem ya shilem 90 bo BJP dangi aotsü. Capitalist

temi parnok indang cheque book tem lapoker Delhi nung aliba parnok kiburtem nem tenla agütsütsü," ta ashi.

Association of Democratic Rights (ADR) report koba July ita saya liasü, iba ajanga ashiba agi, 2016-17 aser 2021-22 tsüngda electoral bonds ajanga political party tem agizükba tenla ajak senteper crore 9,188.35 liasü aser iba sen nungi BJP indang shilem sen crore 5,271.9751 liasü.

Onoki sorkar kümtetra Caste Census agitsü: Rahul Gandhi

Bhopal, Rongjui/September 30 (Agencies): Congress lenir Rahul Gandhi-i Honibarnü ashiba agi, Centre nung par party-i sorkar kümtetra, linük nung Other Backward Classes (OBCs) kübok nüburtem kwi ali aji tejangja metettsü atema caste-based census ka agitsü.

Madhya Pradesh nung Shajapur district kübok Kalapipal assembly constituency nung lokti senden ka nung o jembiba mapang pai iba olen ya lemsatepa liasü.

"Sorkar kümtetba sülen onoki tamasa linük nung OBC

kwi ali aji tejangja metettsü atema caste-based census ka agitsü, koba tang tashi nisung kati danga tejangjabo meteta mali," ta Gandhi-i ashi.

Pai ashiba agi, linük ya cabinet secretary aser secretary tem densema nisung 90-i dang ahcaayanger aser kasa mapang nung linük nung policy balala aser temzüng ozüng yangluba nung BJP MP aser MLA tem kecha shilem mali.

Madhya Pradesh ya linük nung ochi mashi inyakyim balala benoka inyaksangshiba

teyongtsü lir ta shia Gandhi-i, "Vyapam amala mesükba scheme temi state anokshitsüogo. State nung MBBS degree tem ayoker, tatidang paper leak asüba den tayoka den ayoker aser Mahakal Lok corridor yangluba nunga ochi mashi inyakyim sendaka lir," ta ashi.

Paisa, taoba küm 18 tsüngda Madhya Pradesh nung aluyimer 18,000 soseta süogo, ta ashi.

"Iba tetezü state nung anogoshia aluyimer asem taküm samar," ta pai ashi.



TIR YIMYIM

YIMOBILEM (EDITORIAL)

DIMAPUR

AMUNGNÜ

MONGPUTENI 01, 2023

Mezüngmeshi mesüdaktsütsüla

Mezüngmeshiba indang kodang jembidir, asenoki tsükchitepa raratepba mesüra züktepba indangang jet ta temulungangi arur, anungji tangar nem mezüngmeshi mesüdaktsütsü atema asenji tara, samaro aser nisung tesashi asütsüla ta bilemer. Ajsüaka, tenyar Paul-i 1 Timoti 4:12 nung Timoti dang ashiba o yabo, tangar nem mezüngmeshi mesüdaktsütsüa samarosa sashisashia liang ta ashirba masü saka tangar ajaki tatishitsü tajung agitsüsa taküm merükteta ajemalua alitsü, mesepleptsü, azümasena malitsü, tiyazü mejembitsü, temeim mapa nung anünga malitsü aser tangari mapa ajak nung temulung lemtetsüsa alitsü atema ashirba liasü. Atangji, Timoti ya kanga nendaka inyakba aser Tsüngrem tenzüksü jangraba asangur ka liasü, ajsüaka pa taküm nunga tasü aser tashi itta Tsüngrem metenzüktetsüsa temang aser tanüla nung mekokmein liasü. Ibayongji, Paul i Timoti dang pa poknüng tashidak agi mapang shia timatempa ajungtsü atema 1 Timoti 5:23 nung tsükmenatsü yi terara jemang ta ashiba angutsü. Tetezü, tangar nem asen taküm mezüngmeshi mesüdaktsütsü atema asen temang nunga tashi itta alitsüla. "Pabo temang nung tashi mait, kecha mesütetsü, teti dang shiranga alir," ta tangari asen indang jembira, ibaji asen mezüngmeshia jembiba o asütsü. Iba amaji tangar nem asen temang nung mekokmein aliba agi mezüngmeshi mesüdaktsütsü atema asenoki asen temang anepalu asütsüla aser mapa ajak nung kumdangkumdanga inyakba nisung ka asütsü tim. Ano, Timoti dak tashimait kaji, pai pasasa ilaa bilemba shisatsü ka liasü, kechiyong pa ya asangur ka dang, anungji tenyar Paul nung mapang arogo tasen tenzuka aoba mapang nung arogo aser yimten lenir taintem nem tangatetba agüja sayutsüngia senzüsübaji asangur ka asoshi mapa tasak liasü. Ajsüaka, Tsüngremi Timoti Pa mapa atema ajabaji pa arishi küm, pa temang aser asoajen repringer aja masü saka Timoti dak Tsüngrem mapa inyaksü jangraba shisatsüji dang Tsüngremi repringteta ajaba liasü. Ibayongji, tenyar Paul-isa Timoti tasü itdakja, "Tsüngremi asenok nem tetsübu aser anüalemba tanüla magütsü saka ain tashi, temeim aser tangatetba agütsü," ta 2 Timoti 1:7 nung ajungshiba asenoki angur. Atangji, Timoti dang masü asenok ajak ya ajungli ka dang lir, anungji aji bilemdangbo ajungli kuma aotsüba taküm kati kechi inyaktetsü (?) ta asenoksasa tasü mait bilemtsü. Ajsüaka, Paul-i ashibaji, iba ajungli nungji ain tashi apuokja lir, anungji iba ain aser tashiji amshia tangatetba agi temeim mapa inyaktetsü. Ashiko, asenok dakbo Timoti dang nungi teimba temang nunga aser tanüla nunga tashi mait alitsü. Iba jagi aiben asenoki Tsüngrem tenzüksü asoshia tasümeiteti bilema alitsüa akok. "Ni ama kati kechi sütetsü? Ni ano tain masü? Tazüng temetetba kecha balaka mali, sensaker! Parnoki ni ashiba nung mamangtsü, ni temang nunga mekokmein aika lir," ta asensasa asen ilaa bilema kecha lenia maotsü aser kecha meinyaksü asoshi ajentsü lenmangang bushia kuli aika jembitsüa akok. Iba ama mapang nungji, Tsüngremi asen nem ain tashi agi teblemtsü ajak kokteta aotsüsa tangatetba agütsüba indang ashiba o ya bilemtetsüla. Atangji, asen nem ain tashi agütsübaji Tsüngremisa arua amshitsü asoshi agütsü masü saka asenoki amshitsü asoshi agütsü ta asenoki angateta tamang agi amshitsüla. Ashi, Tsüngrem aruagi amshitsü asübo Pai asenok nem ain tashi magütsüla. Tetezü, alima nung Tsüngrem melena inyaksü asoshi Pai asen nem ain aser tashi agütsü. Iba ain aser tashiji amshia Tsüngremi mulungba mapatem inyakra, shibaibo na mezüngmeshitsü (?) ta Paul-i asenok nem angatetdaktsüner. Nisungtemi asen dak temulung melemteti "pabo tetenya kechiyong pai shitak meinyaksü, paibo metongtsütsü, pa dakbo temulung alemtsüla masü, par sarasadembajibo tiyazü," ta jembitsüsa asen taküm aser kibong lira, tangari asenok mezüngmeshir asütsü. Iba amaji shinga nema asenok mezüngmeshi mesüdaktsütsüsa mapa aser o nung, Tsüngremia aser nisungia asen dak temulung lemteta aser akümtsüba bilemtsüsa asenok alitsü Tsüngrem o agi asenok ajungshir.

OLEMSABANG

Mission to the Nagas aser okadak arogo otsü temeten bushiba : O Rajem

Molungkimong Literature Board

Tir Yimyim Olemsabang 29-30 Sept 23nung Mar Longkumer-i zuluba ocet nung tongtipang onlong aika kongshia lir. Saka kodang mapensa züludir, otsü aser tetetzü balaka kumadoker asünungji, pai züluba ocet nungi tongtipang onlong kar agitetter primary aser prime sources dak ajemdaker yamai apensa zülutsur.

1. '1986 Special Committee Report ji tatembang asü masü ?

Talila kechi tebushiloktsü Ali ?

1986 ABAM Resolution No. 40.nung yamai zülua lir. "Arogo otsü maparen dak sendakba nungi adokba ken O case ama Mungdang mesüra kija arogo shingaia mejembitsü, nungdakra zülua aliba kuli (document) bushiteptsü akok. "Committee-i osang bener aruba ama Mungdangi agizüka ayu, aser iba ken-o nung Mungdangi kecha shilem (responsible) magitsü ta lemtet."

Ken o case ama Mungdang mesura kija arogo shingaia mejembitsu saka "nungdakra, zülua aliba kuli (documents) bushiteptsü akok" ta zülua aliba tetezü ABAM lemtet 1986 ji tazüngkonema metembang aser documents tasen ngüra repringshitsü akok ta ang lapoka doktsü.

Rev. Dr. K. Imotemjen Aier shiba 1981 ABAM Special Committee nung member ka liasu pai yamai zulu nung dokja lir: "Since the documents were left in written a 100 years past, the judgement was given based on the readings of these writings and we placed in record on our report that it is how it was understood. Therefore, it is not to say yes or no, but it suffices just to state that the final word on it is that, that is how it is understood." (Ref: History of the Establishment of the First Baptist Church in Naga Soil. Rev. Dr. K. Imotemjen Aier, Dt. 14.08.2020).

Anungji hao-a (Yes) ta ashirba a masü aser nunga-a (No) ta ashirba a masu, ta asüba Resolution ka nung koda sur tazüngkonema renemba ta shiteter. Aser tatem kuma ayuba asünungbo kechiba kuli-o (Documents) bushiteptsü akok?

Iba committee 1982-86 tsüngda nung, Molungyimsen den mensem pezü (4) tashi aka saka Molungkimong bo ken a maja. Aja asübo, iba report ya ano tabensaba süla aser tanü iba densa ya majürula ta sasa bilemer. 1986 lemtet dak sentakba documents tasen aika bushiloka lir aser yamaji tarutsü nunga ngua aotsü.

Arogo otsü ken-o nung 1986 kum Mungdang Resolution No. 40 indang rajem O ka lemsaa, iba ocet azüngertem asoshi tebilemdangtsü agütsür. Iba committee report ya TANGATETBA aser TELEMTETBA ta lemsar. TANGATETBA 1- "Molungyimsen Arogo Molungkimong yimdak December 23, 1872 nungji tenzük ta angateter." TANGATETBA 2 - "December 23, 1872 nung tenzükba Arogoji amangbapur yim tasen akumdangji bener ait." TELEMTETBA - "Committee-i osang bener aruba ama Mungdangi agizüka ayu, aser iba ken-o nung Mungdangi kecha shilem (responsible) magitsü ta lemtet." Süra iba Resolution No. 40 TANGATETBA aser TELEMTETBA nung ajemdaker 1986 Inty Mungdang nun Molungyimsen Arogo 1872 benshiang ta tazüngkonema lemteta lir asü? Mesüra Molungkimong Arogo 1919 nung ang amendakang ta lemteta ali asü?

2. "23 December 1872 to 23 October 1876 tashi nung Molungkimong nung Kristantem tamang indang tezüluba kuli kar bo ali asü mali ta ajia bilemdangtsü nungdak"

Nov 10, 1872 nungi tenzuka, Molungkimong nung tamangertem metangdangi aruba record tejangja lir. Asen tsürapur-i letpet tsungtepa aliba mapang, tejen yimsü aser tamangbatem doktsür Kristan yimsü agizük nungji, asenoki parnok dang pelati. Hau, parnok tamang ji asenok 'tanü asüng standard' bo memenüp liasü sudi saka parnok tamang indang kuli balaka bushia makazüi, Kristan yimsü arur küm 150 junger külen asenok tamang kechi jenjang nung lir, aji tama shisadangtsüla.

3. "Kodang yimsü tasenji Molungkimong nung sadema muotetsüsa aküm, idangji angazükba agi Rev. Dr. Clark-i pa temba Wanlai dangi Tamlui aotsü bilem."

March 2, 1876 küm Dr. Clark Molungkimongi alitsü atu. Iba mapang, Godhula aser tebuttsü Lucy nabo Molungkimong nung telidak liasü. November 10, 1872 nü Sibsagar nung parnok 9 aser December 22, 1872 Molungkimong nung parnok 15 baptirtem den mepabti alir tamangertem anir, tekülem ki ka sür arogo ji repringa liasü.

1872-76 tsüngda nung Dr. Clark-i Home Board dangi züluba tem nung Molungkimong nung mission mapa takok ngua aoba aser pa atutsü renemba indang ang zülua angütsü. Ano pa Molungkimong nung March 2 1876 nungi October 23 1876 tashi aliba mapang, 'Kristan yimsü sadema muotetsüba' indang mesura Mungkimong nung sadema meliteterji Tamlu nung Wanlai bushia tua alitsüba indang kecha nunga zülua mali. Dr. Clark-i Home Board dangi züluba (dated 18 October 1876) nung küla pa indang postal address ji 'Haimong village' asütsü ta lephsia ashiba ang angütsü.

Hau, ABMU jibo China donga aotsü nukjidong nung aruji, Tamlu aser Merangkong dang masü, oteba tesem ajaki aotsü jembia alitsü saka item tebang otsü ojangtem agi Molungkimong nung yimsü 'sadema muotetba' indang kuli mesayur aser missionary correspondence letters den contradict asür.

4. 'Merangkongi Molungkimong amak. Kum ishika shinga maliasü. Iba mapang arogo liasü ta meshitetsü.'

British record nung Molungkimong yim amakba ya April 4, 1886 ta lir. Iba mapang Wokha Commission Mr. Greer-i iba küm June 7 nung, punishment ka ama Merangkong-i sepaitem anir tuaki rongtsü aser June 11 nung tangatettep kati arua iba Ken o tembangtsü. Anungji, 'kum ishika shinga maliasü' ta asüba ji official records den contradict asür. Aji dang masü, oral sources nung aliba agi yim ajak rongtsüba masü aser yimer ajak bo yim doktsür mao. Kar alu nung aser anameta nung semtu yanglur alu yima ali. Anungji, iba mapang tatsüka tsüngda nung yim doktsür maertem liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Nigeria nung kiralongrar temi tamanger 16 tepset

Abuja, Rongjui/Sept. 30 (Agencies): Taoba hopta tamanger aika tepsetba sülen ano Fulani shururu metsürtem aser danga kiralongrar temi Kaduna state, Nigeria nung tamanger 15 tepset ta osang ajanga ashir.

Bodhbarnü (September 27) lendong agütsür temi Kauru County kübok Khristanpur timba aliba Angwan Magaji yimtsüing amakdang tamanger asem tepset aser aji masüdüng Mongulbarnü Kigam yimtsüing nunga tamanger asem tepseta liasü, ta iba tesem nung lenir Abel Habila Adamu-i ashir.

Kiralongrar temi yimtsüing ana nungya nisung pezü yirutsü, ta pai ashir.

"Nok-nü bena aliba Fulani shiruru metsürtem aser kiralongrar temi Khristanpur dak asendenshir amakba osang onoki temolung shiranga lemsateper. Adangji nung ozü lima nung azü ayimer aser tai maket Khristan zü agi temeden asoshi ajeper," ta Adamu-i Morning Star News dang text message ka ajanga ashir.

Chawai Development Association tir Adamu-i yimtsüing ana nung asürtem ya Martina Ishaya, 55; Sunday Gizindi, 55; Danjuma Alah, 35; Joseph Baza Dauda, 23; Danladi Yakubu, 57; aser Simon Chibi, 33 ta jangjatsüogo.

Yirur alirtem ya Yohanna Anoh Ishaya, 27; Gado Monday Kiri, 53; Victor Timothy, 23; aser John Auta ta jangjatsüogo.

"Iba ya ajanga asen lima ya asen tsükchir, kiralongrar aser shiruru metsürtemi amaker ta jangja-jangja sayur," ta Adamu-i ashir.

Pai Nigeria sorkar dang Kaduna state aser danga nung kiralongrar temi Khristanpur azü dokshiba tekeraba nung anendaktsütsü ajungshia liasü.

"Nisung takum ya kanga temeshi aser tongtipang lir, anungji yimjung meimba lokti aser nüburtem atema iba ama azüdokshiba ya tesempatsü mapa lir," ta Adamu-i ashir.

"Onoki sorkar dang jenjang ajak nung security dang temolung agüja aser ochishia iba tebilemtsü azüoktsü mepishir."

Lendong agütsür temi Mongulbarnü (September 26) Zangon Kataf County kübok Khristanpur timba aliba Takkanai yimtsüing maka tamanger trok tepset aser pezü yirutsü, ta yangji alirtemi ashir.

"Shiruru metsürtem ya prangbong aser danga hadir tajung aser tesashi bena lir aser parnoki yimdaklirtem mejangtsü renemba mapang aonung 7:00 ako meta amak. Asürtem rongnung tanur ana liasü," ta Zangon Kataf nung lenir Samson Markus-i osangbener dang text message ka ajanga ashir.

Atyap Community Development Association indang tir Samuel Achi-ia lendong agütsürtem ya Fulani shiruru metsürtem lir aser parnoki ki ana nung mi senloktsü, ta ashir.

"Parnok yimtsüing nung ghonda ka dak tali lir ao," ta Achi-i ashir.

Kauru County nung shiruru metsürtemi Hombarnü (September 25) Kigam yimtsüing maka yangjia Khristanpur asem tepset aser asem yirutsü, aser iba lendong ya aonung 9:00 ako meta atalok, ta yangji alir Robert Dodo-i ashir.

"Yimdaklirtem kidang nungi jena aodang kiralongrar temi tenük agi angur ajak dak injang khaloktsü," ta Dodo-i ashir.

Chikun County nung kiralongrar temi September 19 nü Khristanpur timba aliba Mararaban Rido yimtsüing maka nisung trok pua bener ao aser September 23 (Honibarnü) tamanger ka tepset, ta yangji alir Alheri Magaji-i ashir.

September 19 nü lendong ya anepdang 1:00 ako meta atalok, ta lai ashir.

"Mararaban Rido yimtsüing nung tamanger ka ki amak aser iba kibong nungi züngsem ana pua bener ao," ta Magaji-i ashir. Parnoki ano tetsür ka aser lar tanur asem pua bener ao aser September 23 (Honibarnü) aonung 8:30 ako meta meyipa arua yimdaklir ka tepset, ta lai ashir.

2022 küm tamangba yimtsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashir.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaksüba nunga Nigeria ya temaba jenjang nung lir, aser tamangba yimtsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadanga rongnung Nigeria ya jenjang trok buba nung lir, koba taoba küm jenjang tenet buba nung liasü.

"Fulani, Boko Haram, Islamic State West African Province (ISWAP) aser danga telungpur temi Khristanpur aliba tesem amaker, tamangertem tepseter, tetsüing-tepen alok-alatsür, tashiyim amshia shi nung medemer aser rongsen agi alangdaksütsü meshia pua

bener aor mesüra alar ama ayur," ta World Watch List ajanga ashir.

"Taküma linük south tsütsü Khristanpur timba aliba tesemtem nung azüdokshi ya maneni lir... Nigeria sorkari tamangba yimtsü nung ajemdaker reshikangshia mamshir ta maneni tekong meranga nokdaker, anungji Khristanpur temeden nung aitsüba memerenshi yutsür."

Nigeria aser Sahel nung Muslim Funali nungertem timba lir aser parnok ya kinidong noklang aika lir aser balala nungi jakzük aser item Fulani nung kari Islamist ideology retreat amshitsü meranger, ta United Kingdom indang All-Party Parliamentary Group of International Freedom or Belief (APPG) ajanga 2020 report nung shia liasü.

"Parnoki Boko Haram aser ISWAP den mesüktepa tasa amshir aser Khristanpur dak tenük yokba tejangja sayur," ta APPG report ajanga ashir.

Khristanpur meyong ali tashiyim amshia rakzüktsü aser Islam yimtsü amangdaksütsü nükjidong nung shiruru metsürtemi Nigeria indang Middle Belt nung Khristanpur dak amaker, ta Nigeria nung Khristan lenirtemi ashir.

Khrista agizükba mechi tanur ka chiyongtsü magütsüi shibanga ayu

Nairobi, Rongjui/Sept. 30 (Agencies): Khrista agizükba mechi Muslim nung kati par jabaso chiyongtsü magütsüi ita pezü dak tema shibanga ayu, ta Uganda anüdoklen evangelistic team kati tan ita jangjatet.

Bugiri district kübok Nankoma nung alir Musobya Aramanzani-i par jabaso arishi küm 17 tanur yagi Iganga nung sayutsüingiba angar küm tetenzüklen Khrista agizük ta angazük. Par jabaso ya Iganga nung boarding school ka nung zünga liasü aser iba school nung tesayur kati Aramanzani dangi phone sür par jabaso tamangba yimtsü melenba indang osang agütsü aser pa kidangi meyipa shilangba sülen shibanga ayu, ta yangji aliba pastor kati ashir.

Pastor-i Nankoma nung kiboksem aodang September 15 nü iba osang ya angashi. Aji masüdüng Aramanzani-i pa aser danga Khristanpur evangelistic campaign mapa inyaker par kidangi aittsü memela aser yangji alirtemi parnok dang par jabaso Khristan yimtsü agizükba mechi ita pezü dak tema shibanga ayuba indang shia liasü.

Parnok September 15 nü meyipa shilang aser pastor-i par kibong asoshi minute

ANO GO ABEN TSÜNGREM DEN

Mezüngbuba 'kü adianu'

"Tama oang, aser ne adianu den jungteping

" (Mat. 5: 24).

Asenoki mezüng mapa mezüng südaktsütsüla. Kodang asenoki Kibuba dangi tenla bener arudir Pai teka repranger aser tenla agizüker. Tagütsür tekaji menena lira iba tekai agütsüba tenlaji Pai magizüker. "Shidokang aser ne sasa merüka liang." Tama oang aser ne adianu den jungteping; idangji arung aser ne tenla agüjang."

Amitsür tenla tila liasu saka la tenla putu ajak nung osang tajung sayudak ajak nung jembir, kechiaser lai la tajungtiba agütsü. La teka temerük aser tesadem liasu. Iba teka nung Kibuba dak atsüingba nü tarak keta liasu. Tenla tilaji Kibuba kangki den mezüteper liasü.

Ano iba yagi kechi agi lokti tekülemji Kibuba matsüngdang tesempatsü kümdaktsür iba indang sayur. Tekülemertem tsüngda tesendaktep raksaa yur asenoki Tsüngrem külemtsü asoshi külemi senteper. Ano teka mindangba pur kar arur. Auyatsü mulungsentsü adener kar arur. Kari adianu kar yirutsür arur. Ajaki sempet tenla bener arur. Tsüngrem Oi ashir, tamasa ne adianutem den aser ne sasa den jungteping aser arung aser ne tenla agüjang.

ishika sarasademtsütsü mepishi tetsüi tzü dang agütsü, ta aser parnok nem minute pongu pastor dang tetsüi ashir.

"Onoki sarasademba mapang ki telung nung tezüknem tamajung ka menema liasü," ta security mechi tenüing miimbanga ayusang pastor-i ashir.

"Onok nisung aika asünung onoku tezüknem adokba takdangi nungboka ai aser yangji tanubosang ya tashi kanga mait kumer aliba angu."

Iba tanubosang ya yasatzüra teret nung takep agi meyr liasü. Parnoki tanubosang ya tashiyim agi anizük aser temang anepalutsü asoshi mozüki kati anir ao aser pastor den dangar kar Muslim nungbar kidang ali.

Aramanzani-i pastor aser par telok dang, par jabaso kidangi meyiba shilangba sülen pa den kinunger temi sendaka ayu aser chiyongtsü magütsü, kechiaser pai yimjak nung Khristan akumba nangzük, koba par kibong asoshi maksü liasü, ta ashir. Iba osang ya onok dang Iganga nung aliba Ibum Baz secondary school nung par tesayur ajanga sangoktsü, ta teboi ashir.

Mozükidang tanubosangi pa timtemba indang o kar dang jembitet, ta pastor-i ashir.

Pa shibanga aliba mapang

agütsü, ta pastor dang tetsüi ashir. "Tetsüi miima tzü dang agütsü, saka kodang lar jabaso shirang, lai pa nem mozü magütsü saka pa kibong nung temenen ka lir aser asütsüla ta mezüngmeshi o shia liasü," ta pastor-i ashir.

Mapang tatsüka lir Aramanzani-i mapa tamajung inyakba aser danga temenen tem nangzük aser pa Khrista dangi meyip, ta pastor-i ashir.

"Pai onok dang iba tatalokba police dang mashitsü mepishi. Tang iba tensa kanga tepenja lir, kechiaser tebo aputsü tsübor aser kasa mapang pa Khristan ka kumogo. Onoki mezüngbuba nung timtema alisang tanubosang ya anepalutsü nungdaker, aser iba sülen kibong den jembishinü akatsü," ta pastor-i ashir.

Uganda nung Khristanpur reshikangshia amshiba rongnung ibai tasenba alitsü.

Uganda indang constitution aser danga ozüngtem nung tamangba yimtsü temeden, pei yimtsü dangar dang sayutsü aser tamangba yimtsü ka nungi ka dangi meyiptsü temeden lir.

Uganda nütsüing yongsük shilem 12 dak tema Muslim nung lir aser parnok ya timba linük anüdoklen alir.

**AO OSHI ANGAZÜKDAK:
TANÜ ANGAZÜKTSÜBA OJANG**



Sangdang

- (v) ka agi ana küma pila (break into two)
- * Menoknok tulu anakdang tenem ana küma sangdang.

Sangdong

- (v) Metetdaksü (announce)
- * Yimteni asüing yimkong nübo adoktsü sangdong.

OLONG PAITEP # 6653

	1		2		3		4	
	5							
					6			7
8			9					
10		11	12					
								13
			14		15		16	
			18					
19								

TIPIEN

- 3. Joko mali
- 5. Tanur tebur
- 6. Teti taküm alidak
- 8. M ___ kzü
- 9. Mimong nung aliba
- 11. Lung nung tapok
- 14. Aginüdaksü
- 16. A ___ bang
- 18. Tenük majung
- 19. Inyaksü lateta ayuba

LANGTSÜNGLEN

- 1. Nguyutep
- 2. Tetsüing agi ao
- 3. Tajungba asütsü merang
- 4. Temokong masü
- 7. Saku
- 10. Lemshi
- 11. Khu maket
- 12. Tzü mamongba tou ka
- 13. Korang tapu ka
- 15. Jenti

OLONG PAITEP # 6652 TELANGZÜBA

TIPIEN :

- 1. Telok, 4. Aluru, 6. Ozüing,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Scotland Yard (officially New Scotland Yard) ta asüba ya Metropolitan Police Service headquarters dang ajar. I ba yagi London yimti nungbo police inyakyim ajunga amato anepalua repranger. 4 Whitehall Place nung Metropolitan Police headquarters tejenba tsütsü yimdong ka tesülen 'Great Scotland Yard' ta ser entrance ka liasü aser idak nung jagi agiteta iba tenüing ya aja. Tesülenbo Scotland Yard ya nüburtemi police station bushia aruba tesem (entrance) ka kümadok.

I ba ongko ya inyakdangang

10 + 11 = 200

11 + 13 = 266

14 + 15 = 392

16 + 17 = ?

Assam sorkar ketdangsür 2 süpokrem meshiba atema apu



Guwahati, September 30, 2023 (Agencies): Assam nung Directorate of Vigilance & Anti-Corruption Assam ketdangsürtemi September 30, 2023 nü sorkar ketdangsür ana süpokrem meshia agiba atema puogo.

Morigaon nung Lot Mandal kati mapa inyaksü atema Rs 10,000 süpokrem meshi ta Directorate of Vigilance & Anti-Corruption nem osang sangoktsü.

Iba ketdangsür ya Morigaon kübok Circle Officer, Lahorighat Revenue Circlen nung Lot Mandal Reba Kanta Bhuyan lir.

Tanü DVAC telok kati Circle Officer, Lahorighat Revenue Circle nung ketdangsür aputsü

atema tasa atonga liasü. Tanü nikongdang 5:00 ako meta tiyongtsü nung inyaker Nakbor Ali ta ser nisung kati süpokrem sen nungi Rs. 3,000 meshidang apu. Iba nisung yagi Lot Mandal Reba Kanta Bhuyan den yariteper. Ali ket nungi süpokrem sen nguogo aser Bhuyan-i süpokrem meshiba aser tiyongtsü nung inyaker ka ajanga meshiba atema tai tonglokja puogo.

Ano, Lakhimpur district kübok Narayanpur revenue circle office nunga VACD ketdangsürtemi lot mandal ka apu. Iba nisung ya Dulal Chandra Baniya lir aser pai mapa kar inyaksü atema Rs 80,000 süpokrem meshi.. Iba

atema jembitepba sülen senji Rs 60,000 tashi ajem.

Süpokrem agütsütsü memulungba agi iba nisung jagi VAC Directorate nem osang sangoktsü.

“Tanep Dhalpur nung aliba VAC Directorate telok kati tasa ka atonga inyaker. Tanep 9:35 ako meta Dulal Chandra Baniya-i par kidang süpokrem sen nungi Rs 5,000 meshidang apu” ta police-i metetdaksü.

“Ketdangsürtemisa Baniya’er ki mita aodang Rs 2,49,900 ngutetogo” ta police-isa ashi.

Item tatalokba ana dak sendakba nung Prevention of Corruption Act, 1988 kübok ken o tem benokogo, ta parnokisa shisem.

Tipra Motha mokdangba sentong takok ngua agiogo

Agartala, September 30, 2023 (Agencies): Tipra Motha-i mokdang ayongba ajanga Tripura Tribal Areas Autonomous District Council (TTAADC) ajungalen shibanga liasü.

Tipra Motha-oi Tripura nung lisopurtem asoshi yimten lemtet ka agitsü takhangba agüja ghonda 12 mokdangtsü ayongzük.

Iba mapang shishishilembadak ajak shibang, public transportation services mesenzü aser lenmangtem kanga azüingazünga aküm.

Tripura Police-ia lendong nungi kümzüka alitsü atema police peria lemsütsü. Külen state sorkari district council nung office ajak akhi ama mapa inyaksü tetuyuba agüja

liasü. Ajisüaka, TTAADC nung iba mokdang kanga junga mongogo kechiyong nisungtem kidang nungi malu aser shishilembadak ajak shibang.

Tripura nung lisopurtemi mapang talangka nungi India sorkar den tebilemtsü balala lemsatepa aruba rongshitsü atema Tipra Motha-i iba mokdang ayongzüka agiogo.

Manas National Park nung home guards-i taa talila meshir

Guwahati, September 30, 2023 (Agencies): Assam nung aliba Manas National Park and Tiger Reserve nung mapa lemsüka aliba home guards-i parnok taa tujang ta lungkak aiter.

“Tesüiba nung home guards nem anogoshia Rs 200 agütsü. Ajisüaka yaküm October ita

state sorkari parnok anogoshi taa Rs 700 tutsü. Tia maka budget nung melemzükba agi October ita nungi home guards nem itasen magütsü arur” ta Manas Park nung Field Director Rajen Choudhury-i ashi.

Hopta tejakdang budget mulunga agizükogo aser

itasen agütsütsüba maparen tang teinyakdak lir, ta paisa ashi.

2023-2024 atema Manas National Park and Tiger Reserve lapoktsüba renemogo.

October 1, 2023 nü Bahbari Range nung tourist tem asoshi park lapoktsüba sentong ka agitsü renema lir.



September 30, 2023 nü Manipur Legislative Assembly anasa aliba THAU Ground nung amitsürtemi pei pei kinungbo mangyimba den parnok noksatem anasa naro yuja tetushi agütsüba noksa nung angur. Iba sentong nung Meitei amitsürtem den Arambai Tenggol (AT) züngsem meyrjang aika adenshir tasür noksa 73 yua alidak tetushi agütsüogo. May 3 nungi Meitei aser Kuki nung tsüingda rara nung Arambai Tenggol züngsem 13 dena Meitei nung 73 süogo. (Imphal, September 30)

Kiralongrari Balochistan amakba nung RAW dena lir: Interior Minister

Quetta, Rongjui/Sept. 30 (Agencies):

Tawa Balochistan nung kiralongra mapa inyakba nung India indang foreign intelligence agency - Research and Analysis Wing (RAW) - dena lir, ta Pakistan indang interim Interior Minister Sarfraz Ahmed Bugti-i Honibarnü tai tongloktsü.

Quetta nung osangbener den jembidang, "Shirnoki 'facilitator' mapa inyaker, shibai ya inyaker - shiba südir süang, nai koma nüngja agütsünür agüjang - parnok ajak onok asoshi kasa dang, ajak kasa nungi poktet, ajak tesem ka nungi amshir, item ajak ya RAW mapa lir," ta pai ashi.

"Ya masü dang atalokba ajak... item ajakji kaketogo - Balochistan nung lendong

lutetem ajunga - aser item ajak nung RAW dena liasü, aser item yagi Pakistan samatsüner," ta minister-i ashi. Ajisiüaka pai sangdongba bhukumtsü kuli kecha pai magütsü.

Balochistan kübok Mastung nung 12th Rabiul Awwal procession dak tenük yoker takum bendanga agüja bomb pokloktsüba nung police tanishir ka densema nisung 55 takum agir anogo ka lir Bugti-i iba o ya ashi.

Tang tashi iba lendong agütsüba telok katia tenüng agia mali. Ajisiüaka Pakistan nung lendong tulu agütsür Tehreek-i-Taliban Pakistan (TTP) teloki iba lendong nung shilem mali ta shiogo.

Iba lendong mechi Balochistan nung aliba

caretaker government-i anogo asem mangyimtsü sangdongogo.

Hokulbarnü bomb tanabuba ya Khyber Pakhtunkhwa kübok Hangu yimti nung pokdakja nisung pongu tepset aser 12 yirua liasü.

Honibarnü osangbener den jembidang Bugti-i kiralongrartem tatem tashi bushitsü nangzük aser shinga memesüzktsü ta ashi.

Kiralongrartem kong nungi inyaksangshir aji sorkari meteta lir aser onok par süki tonga aotsü aser parnok anema raratsü, ta pai ashi.

Mapang ka-ka nungbo telok kati lendong agütsütsü aser telok kati tenüng agir, saka tawa lendong agütsüba bushisingdangogo, ta interior minister-i ashi.

MULUNGNEN O



Shilua marutsü lima ka yima temeimbatem nüktzü neta yutsür 15th September, 2023 obala asür Mr. Soamongba Longchar (Waromung) Alongkima asüba benjong nung kwikati onok den yaritepogo, nenok ajak dangi tsüngtong marutet nung iba osang kaket ajanga onok pelaba lemsateper.

*Temeim Kinungtsü
Chirnurtem, Kinungertem & Semchirtem.*

Office of the Longsa Yimsoshir Zünga KHONANG TETUSHI

Wb. Imotemjen Longkumer, Asür Wb. lmingandang Longkumer, aser Asür Wt. Nükshikala Jamir, tena jabaso Government mapang tenzükbawad nang Deputy Director Department of Horticulture nungi Joint Director, temaba jenjang tongtetba asoshi pelaba sangdonger.

Tsüngremi nübur tenzüksü asoshi maneni arishi anema aliba den shisatsü tali moajang ta züngartem tamang sarasadem.

Sd/- L. Limangangshi Jamir Convener	Sd/- L. Imtionen Pongen Secretary
--	--

Afghanistan dang kiralongrar tesep mekumdaktsütsü ajungshi

Kazan, Rongjui/Sept. 30 (Agencies):

Afghanistan dak sendakba nung China aser India densema regional security senden ka Russia-i ayongzükba nung khen asoshi amenoka aliba Afghan sorkar dang linük nung kiralongrar telok balala samatsütsü aser kiralongrar tesep ka ama mamshidaktsütsü asoshi mera tajung agütsü ayongzük.

Iba tayongzükba o ya pongu buba Moscow Format Consultations on Afghanistan senden nung pangzünga liasü, kong Pakistan, China, India, Iran, Kazakhstan, Kyrgyzstan, Russia, Turkmenistan, aser Uzbekistan nungi tongti ketdangsürtem adenshia liasü. Iba senden nung Saudi Arabia, Qatar, United Arab Emirates aser Turkiye nungia tetushi tesemdang ama arua dena liasü. Iba senden ya Russia kübok Kazan yimti nung Hokulbarnü amen.

Arütsü alema kiralongra mapa inyaksü asoshi telungpur temi Afghan linük amshiba atema Pakistan-i aiben ken o benoka liasü. Tawa sangdong kar nung Pakistan Army ajanga telungpur inyakyim tali akumba asoshi Kabul tenüng asen aser Afghanistan nungi telungpur ket nung nok-nü tasen aliba ajanga Pakistan telung nung makteter ta shia arur.

Afghanistan nung aliba sorkari telungpur anema mera agütsü aser Doha agreement sülen anidaktsü imlar, ta Pakistan mitkar temi shiogo.

"Kidanger linük nung Tehreek-i-Taliban Pakistan aser danga kiralongrar tem talenba maka aser kiralongrar temi nok-nü tasenba ngutetba yagi Pakistan security nung kongshir," ta ISRP ajanga sangdong ka nung ashi. Iba senden tembangba sülen Russian Foreign Ministry ajanga sangdong ka agütsüba nung, 'kiralongrar teloktem, talisa ISIS ajanga Afghanistan nung security tsütsü tensa mejungi aliba indang tebilemstü senden nung shilem agirtemi lemsatepogo,' ta ashi.

Afghanistan nung amenoka aliba kiralongrar telok ajak loksatsütsü, samatsütsü aser nokdangtsü asoshi Afghan nung tang aliba sorkar dang ayongzükogo.

Parnokisa industrial drug production densema temesepba mozü anema mera tajung aser shidak agütsü nungdakba jembai.

Senden nung shilem agirtemi tang aliba Afghan ketdangsürtem dang Afghan li nungi adokba kiralongrar aser temesepba mozü shibelenba ajanga timtem agütsüba koktettsü asoshi region nung aliba linüktem den tali

lungjemshitsü ajungshi.

"Shilem agir timbai Afghanistan nung 'external forces' ajanga kiralongrar bhukumba anema jembai," ta sangdong ajanga ashi.

"Afghanistan nung kin aser lokti balalai aginüba ama sorkar tentettsü asoshi inyakba nung terenlok mali" ta senden nung adener temi angatet.

Afghan ethnic backgrounds nungi nisung kar Kabul administration nung shimoka liaka political tsütsü telok balala agi anünga lir.

"Afghanistan nung yimjung nung angatetepa ajak densema sorkar tajung ka dentettsü asoshi ethno-political groups nungi teshimtet nisungtem den jembishinüa mapa agi inyaka sayutsü iba senden nung Afghan ketdangsür dang ajungshi.

Senden nung shilem agirtemi tang aliba Afghan ketdangsürtem dang Afghan nüburtem tia tajungba kumdaktsütsü asoshi nüngdakba inyaksü aser bendang limai jena aoba nokdangtsü aser refugee tem meyipa shilangtsüsa inyaksü ayongzükba liasü.

Tetsür-tebour, kin mesüra tamangba yimsü mebendangi ajak nem kasa employment, education aser justice agütsütsü kanga tongtipang lir, ta parnoki ashi.

US-i Serbia dang Kosovo arrtsü nungi sepai anientsü mepeshi

Washington, Rongjui/September 30 (Agencies):

Kosovo arrtsü nung Serbia nung nung sepaitem aika adenshibaba sülen US-i Serbia dang sepaitem anientsü asoshi mepeshia arudar.

Taoba Deobarnü Kosovo kübok Serbia nung timba aliba tesem nung Kosovo police aser telok ka nungi nisung 30 shi khatepba sülen tensa mejungi lir.

Taoba ita ishika Kosovo nung nütsüng yongsük agi ajema aliba Serbia nung aser Albania nung tsüngda tensa mejungi kümer lir.

Tang tensa mejungi aliba dak sendakba nung UK-i ashiba agi, parnoki iba tesem nung Nato peacekeeper tem den longjemtsü asoshi sepaitem yoktsü.

Taoba Deobarnü monastery ka nung khatepa sülen Kosovo police ka asü aser iba tesem amaker asem tepsetba sülen NATO-i ashiba agi, parnoki sepai talila yoktsü atema renema lir.

Iba tatalokba sülen Kosovo sorkari parnok indang prangbong injang aser hadirtem aika sayuogo aser iba lendong bener arutsüba atema teyari agütsüba asoshi Serbia sorkar aija liasü.

Hokolbarnü Kosovo-Serb political party tongtibang Serb List tatong Tir Milan Radoicic-i iba tesem amaktsü atema pai achaayangba nangzükba sülen

mapa nungi anena liasü. Ajisiüaka Belgrade kecha teyari magütsü ta ashi.

Hokolbarnü White House National Security Council otongdar John Kirby-i ashiba agi, arrtsü nung Serbia-i sepaitem aika yokba den tank aser artillery amenoka toktsüba ya minprongtsü ka lir. "Iba ya shibulutsü ka lir. Iba ya inyaksü asoshi nisung ka ana adenshibabo memesük," ta Kirby-i iba tesem amaker indang ateshia jembai.

"Onoki Serbia dang arrtsü nungi sepaitem anientsü mepeshir," ta paisa ashi.

Kirby-i ashiba agi, sepaitem ya taoba hopta nungi adenshidar, ajisiüaka kechi atema arrtsü-i sepaitem yoker iba indang kuli tejangja memetet.

Paisa, US Secretary of State Antony Blinken-i Serbia Tir Aleksandar Vucic dangi call süa tensa azüoktsü aser sensaksem tenzüksü asoshi mepeshia metetdaksüiogo, ta ashi.

Maneni Kirby-i, US National Security Adviser Jake Sullivan-i Kosovo Ato Kilonser Albin Kurti den sensaksemogo, ta ashi.

Vucic-i, arrtsü nung sepaitem timba akümba ya masüa ta mashi saka sepaitem raratsü asoshi renemer ta ashibabo magizüki liasü.
(Maneni tapak 8 nung...)



New York kübok Brooklyn nung nisung kati kilentzü yimdokdaktsütsü merangba noksa nung angur. Tzünglu kanga sashia aruba ajanga New York metropolitan tesemtem mubanga nüburtem kanga tim atemer.

Asian Games 2023: Bopanna-Bhosale nati gold medal angu



Hangzhou, China nung tang asaya aliba 19buba Asian Games nung India tebur Squash team-i gold medal anguba sülen tangokba noksa nung angur. Team nung Abhay Singh, Mahesh Mangaonkar, Saurav Ghosal aser Harinder Pal Sandhu nunger densema liasü.

Rongjui/September 30, 2023 (Agencies): Asian Games nung Honibarnü tarep temeyoktep tennis asaya nung Rutuja Bhosale aser Rohan Bopanna nati set ka mekoki aliba nungi meyipa atur final asaya koka gold medal nguogo.

Final asaya nung seed tanabuba nung aliba India team yagi 2-6 6-3 10-4 agi Chinese Taipei nunger tarep Tsung-hao Huang aser En-shuo Liang na koka liasü.

Taküm Asian Games tennis asaya nung India nunger asayartemi junga masayatet ajisüaka parnoki gold ka bo nguogo aser tebu tarep asaya nunga silver medal kabo ngutetogo.

2002 küm Busan nung Asian Games asayaba mapang India nunger asayartemi medal pezü angu aser iba sülen Doha nung 2006 küm medal pezü, 2010 küm Guangzhou nung medal pongu, 2014 küm Incheon nung medal pongu aser 2018 küm Indonesia nung medal asem nguogo, ajisüaka takümbo medal ana dang nguteteta liasü.

Tabur tarep asayar Saketh Myneni aser Ramkumar Ramanathan nati Hokolbarnü silver medal ka ngua liasü, ajisüaka kija asayartem ka danga medal round tonga masayatet.

Honibarnüsa 10m air pistol mixed team event nung Sarabjot Singh aser Divya TS nati silver medal nguogo.

Final nung India aser China team na kanga toktepa asaya ajisüa India team 14-16 agi tamakok ngua liasü.

Iba asayamung nung India nunger shooter temi gold trok, silver ti aser bronze pongu densema medal 19 ngua lir.

Qualification nung China jakdang tembangba sülen Sarabjot aser Divya na 10m air pistol mixed team final-i ia liasü. Qualification round nung Sarabjot-i point 291 aser Divya-i point 286 ngua tena senteper point 577 angu aser China team-i point 576 ngua liasü.

Final asaya nung India nunger tarep ya world champion marksman Zhang Bowen aser Jiang Ranxin nati tsükdakja liasü.

Kasa asaya nungsa South Korea nunger tarep Lee Wonho aser Kim Bomi nati Japan nunger tarep Morikawa Seiji aser Yamada Satoko na 16-8 agi koka bronze medal ngua liasü.

Maneni Honibarnü tebur squash team asaya nung India-i Pakistan team 2-1 agi koka gold medal nguogo.

India team nung Saurav Ghosal, Abhay Singh aser Mahesh Mangaonkar nungeri

Pakistan team final nung koka liasü. Asian Games nung India team-i tang agi tanabenbuba gold medal nguogo. 2014 küm Incheon nung Asian Games asayaba mapang India tebur team-i final nung Malaysia koka gold medal anguba sülen küm teku lir taküm gold medal ngutetogo.

Asian Games nung ano Hombarnü tebur 10,000m race nung India nunger asayar Kartik Kumar aser Gulveer Singh nati silver aser bronze medal nguogo.

Tenapronglai medal anguba den külemi personal record yanglua liasü. Kartik Kumar-i 28:15:38 nung alizüing tongteta silver angu aser Gulveer Singh-i 28:17:21 nung alizüing tongteta bronze medal ngua liasü.

India nunger asayar anaprongla ya tatembangbuba 100 meter tashi nung medal angutsü timlabo maliasü, ajisüaka külem asemteper asem tsükteper alangba sülen tena jenjang junga aküm.

Kartik Kumar ya Bahrain nungi gold anguba asayar Birhanu Yemataw Balew (28:13:62) sülen second ana shi agi tesülen liasü. Iba asaya nung India nunger asayartemi medal angutsü imla maliasü, ajisüaka tiaka medal ana tashi ngutetogo.

US-i Serbia dang Kosovo arrtsü...

"Ozü sepaitem raratsü asoshi renemdar ta temaba jenjang nung jembiba ya tai lir, kechiyong ni kecha tetuyuba magütsü aser iba ya shitak masü," ta Vucic-i ashi.

"Ita ka ana tejakdang yoka aliba sepa dang nungi tesadanga tang iba tesem nung amenoka mali," ta pai ashi.

Deobarnü Banjska kübok Serbian Orthodox monastery ka sabanga ayuba mapang Kosovo police ka aser Serbia nunger asem asüba sülen linük ana tsüingda mangatettep adoka aliba tali tamajungba kümshia

linük ana tsüingda ita aika tensa mejungi arur Deobarnü tatalokba ya küm aika tsüingda Kosovo nung lendong tamajungba liasü.

1990s nung Yugoslavia bakdangba sülen Kosovo koba province ka liasü parnoki nüjiso meshia liasü.

Iba sülen Serbia nungertemi iba linük nung aliba Albania nunger maka liasü.

1999 küm March aser June ita tsüingda Nato-i Serbia nunger bomb poklokja amakba sülen iba mangatettep ta tembanga liasü.

(Tapak 7 nungi...)

Kosovo nungi Serbia nunger sepaitem atstüingina ao, ajisüaka Kosovo nung Albania aser Serbia nunger tsüingda mangatettep kodanga mebenteti liasü.

Kosovo-i 2008 küm parnok nüjiso anguba sangdong, ajisüaka Serbia aser parnok nem teyari agütsür China aser Russia nati iba ya magizüki liasü.

Serbia nunger aikati iba tesem ya par linük tamendakdak ama züingshir, ajisüaka Kosovo nung nütsüingyongsük shilem 92 Albania nunger aser Shilem 6 dang Serbia nunger lir.

Tuensang nung friendly Badminton asayamung ka asaya

Dimapur, Rongjui/September 30 (TYO): Clean Tuensang Campaign nung ajemdaker Tuensang District Badminton Associations aser Aghunato Sub Division Badminton Association na friendly Badminton asayamung ka asayaogo.

Sentong nung o jembiba mapang ADC Aghunato Pakoni, iba asayamung ayongzükba atema Tuensang District Administration dang kanga pelaba lemsatep, koba ajanga

district anaprongla nungi asayartem asaya nung parnok sempet sayatsü asoshi shilem ka ama September 29 aser 30 nü "Free Plastic" omen nung Tuensang Campaign nung District Badminton Associations aser Aghunato Sub Division Badminton Association na friendly Badminton asayamung ka asayaogo.

Kasa mapang nung ADC Tuensang Thungchanbemo Tungoe-ia o tatsüka jembiba mapang, sentepa aliba lokti dang takokba tashi plastic osettem ajema amshitsü ajungshi aser Tuensang aser Aghunato Sub Division nungi shilem agirtemi Tuensang Town Council-i ayongzükba 'Free Plastic' Campaign nongita yaritsü atema nangzükogo, ta ashi.

Ons Jabeur-i Ningbo Open kokogo



Rongjui/September 30, 2023 (Agencies): Tunisia tsür Ons Jabeur-i Ningbo Open final nung kanga junga asaya-a Diana Shnaider 6-2 6-1 agi kokogo.

Jabeur shiba tang WTA rankings nung jenjang tenetbuba nung lir lai China nung iba asayamung final ya minute 78 nung koka tangi agi WTA Tour title pongububa kokogo.

Arishi küm 29 tain asayar shiba iba asayamung atema wildcard ngua asaya liasü, lai Shnaider akokba asaya nung winner 18 ngua liasü.

"Iba amala jenjang tilila agiba ya Grand Slam final ka akoktsü atema jenjangtem lir," ta Jabeur-i ashi, shibai tang tashi nung Grand Slam ka danga koka mali.

La taoba ita 15 tsüingda Grand Slam final asem tashi nung tamakok nguogo, kong Wimbledon final ana aser US Open final ka densema lir.

"Idaki final asayaba ya Grand Slam final asayaba dang nungi tayongba lir, saka iba

ajanga küsasa dak temulung lemteta kümdaktsütsü aser pressure azüoktettsü atema teyari agütsütsü," ta lai shisem.

Kasa mapang nung Japan nung Pan Pacific Open nung America tsür Jessica Pegula-i Greece tsür Maria Sakkari-i 6-2 6-3 agi koka final tongtetogo.

"Court taoba mapang dang nungi takaraba liasü aser iba ajanga kü nem teyari agütsüogo ta bilemer," ta Pegula-i ashi.

"Ni iba maongka ya agitsü meranga liasü," ta laisa ashi.

La final asaya nung Veronika Kudermetova den asayatsü, shibai semifinal nung Anastasia Pavlyuchenkova 7-6 (8-6) 6-7 (2-7) 6-3 agi koka liasü. Tena tsüingda semifinal asaya ghonda asemser minute 25 asaya liasü.

"Ni shitemangbo shitakdang lir. Ni ano tanga asaya ka asayatettsü," ta Kudermetova-i ashi, shibai quarter-finals nung Iga Swiatek tsükdakja liasü.

"Ni teti tashi ita dang alir, ajisüaka khen khen tekelok shisatsü belemadoker," ta laisa shisem.

BILEMDANGANG

"Tetsübu kecha makai nükjidong yuang."